



op
2386

Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj:11-06/02-34-24273-74/26
Sarajevo, 20. 05. 2026. godine

SKUPŠTINA KANTONA SARAJEVO
Ovdje -

n/r Okerić Elvedina, predsjedavajućeg Skupštine Kantona Sarajevo

PREDMET: Odgovor, dostavlja se

Cijenjeni,

Ministarstvo za odgoj i obrazovanje Kantona Sarajevo (u daljem tekstu: Ministarstvo) je zaprimilo zastupničku inicijativu koju je uputila zastupnica u Skupštini Kantona Sarajevo **Marijela Hašimbegović** u skladu sa članom 212. Poslovnika Skupštine Kantona Sarajevo („Službene novine Kantona Sarajevo“, broj: 41/12 – Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24), na 30. radnoj sjednici Skupštine Kantona Sarajevo.

Zastupnička inicijativa:

“Podnosim inicijativu da Ministarstvo za odgoj i obrazovanje Kantona Sarajevo, u saradnji sa prosvjetnom inspekcijom, hitno reaguje na eskalaciju sigurnosnih problema u Sedma osnovna škola, te da se pismenim putem obaveže na preduzimanje konkretnih mjera kojima će se osigurati red i, mir u učionici i zaštititi pravo na mirno obrazovanje. Također, iniciram da Ministarstvo uputi javno izvinjenje kolektivu škole zbog neprofesionalnog načina obavještavanja o smjeni rukovodstva putem medija, prije zvanične institucionalne komunikacije”.

Odgovor:

Ministarstvo se zahvaljuje na upućenoj inicijativi, te Vas informišemo da Ministarstvo posebnu pažnju posvećuje aktivnostima usmjerenim na dobrobit svih učenika i uposlenika u odgojno-obrazovnim ustanovama u Kantonu Sarajevo, kao i kontinuiranom unapređenju uslova za kvalitetan odgojno-obrazovni proces. Ministarstvo je u februaru 2025. godine pokrenulo procedure nadzora i utvrđivanja činjenica postupanja škole u najboljem interesu malodobnih učenika na osnovu inicijative roditelja čija djeca pohađaju JU „Sedma osnovna škola“. Želimo istaći da i Ministarstvo kao organ uprave dijeli zabrinutost za sigurnost i zaštitu učenika, stoga je Ministarstvo i pokrenulo procedure institucionlanog nadzora, kontrole i zaštite, kao i poduzelo mjere u skladu sa nadležnošću.

Uvažavajući najbolji interes malodobnih učenika, njihova prava i obavezu postupanja u najboljem interesu, Ministarstvo nije u mogućnosti detalje o slučaju iznositi trećim licima i upoznavati sa konkretnim,

pojedinačnim slučajem, ali ističemo da je od februara 2025. godine Ministarstvo više puta pismeno komuniciralo sa školom, zatim iniciralo stručni nadzor od strane Instituta za razvoj preduniverzitetskog obrazovanja Kantona Sarajevo, koji je stručni nadzor izvršio u aprilu 2025. godine i kao prvu mjeru preporučio organizaciju multisektorskog sastanka u skladu sa članom 75. stav (6) Zakona o odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo“ broj: 27/24) i članom 15. stav (1) Pravilnika o provođenju mjera odgojno-obrazovne podrške i stručnog tretmana učenika („Službene novine Kantona Sarajevo“ broj: 33/24) ali se isti realizirao tek na dan 31. 03. 2026. godine, tačnije nakon sedam godina, kako navode roditelji učenika i godinu dana od dostavljene preporuke Instituta, nakon izvršenog stručnog nadzora i postojeće obaveze propisane Zakonom, za koju je potrebna provedba.

Ovim putem Vas uvjeravamo da su sve procedure postupanja u radu sa učenicima u riziku propisane i svaka institucija i ustanova u sistemu dječije zaštite ima svoju nadležnost, a u vezi sistemskog postupanja, poduzimanja pravovremenih mjera i radnji koji su propisani Ustavom, zakonima i podzakonskim aktima.

Želimo posebno naglasiti da je Ministarstvo upravni, a ne stručni organ, te Ministarstvo predlaže i donosi propise i nadzire adekvatnu provedbu istih ali ističemo da Ministarstvo kao upravni organ nema mogućnost dostavljanja kako navodite „pismenih garancija“ u radu sa učenicima u riziku, posebno jer su u Ministarstvu zaposleni državni službenici. Za stručni rad i rad sa učenicom u riziku se ne može kako tražite Ministarstvo „obavezati“ jer Vam je poznato da je Ministarstvo organ uprave, a obaveze škole i postupanje u svim situacijama kada je ugrožen najbolji interes učenika su propisane zakonskim i podzakonskim aktima koji propisuju oblast dobrobiti, sigurnosti i zaštite učenika, za sve škole, te je njihova primjena obavezujuća.

Dakle, Osnovna škola „Sedma osnovna škola“ je bila u obavezi dosljedno i pravovremeno provoditi propisane mehanizme zaštite.

Upravo JU Osnovna škola „Sedma osnovna škola“ nije pravovremeno i kontinuirano poduzimala propisane mjere zaštite i odgojno-obrazovne podrške učenicima, a koje su sadržane u Zakonu o odgoju i obrazovanju u osnovnoj i srednjoj školi u Kantonu Sarajevo kao i u podzakonskim aktima, te je nepravovremenim postupanjem i ignosiranjem i minimiziranjem stepena rizika, škola izazvala situaciju u kojoj je dodatno ugrožen nastavni proces, narušen osjećaj sigurnosti u školskoj zajednici, i ugrožen najbolji interes svih učenika. U slučaju da je škola postupala prema Smjernicama, a kako je propisano članom 23. Pravilnika o provođenju mjera odgojno-obrazovne podrške i stručnog tretmana učenika svi referalni mehanizmi (centar za socijalni rad, centar za mentalno zdravlje, policija i drugi) u zajednici bi bili u obavezi postupati, te ne bi bilo potrebe tražiti podršku organa uprave i preporuke za postupanje sa učenicom u riziku **jer Ministarstvo ne može preuzeti operativni rad odgojno-obrazovne ustanove i profesionalaca koji rade u njoj.**

U vezi operativnog rada u školi informišemo Vas da svaki radnik unutar škole prilikom obavljanja profesionalnih zadataka (direktor, pomoćnik direktora, pedagog, psiholog, socijalni radnik, nastavnici, asistenti u nastavi..) ima svoje obaveze i zadatke propisane Pedagoškim standardima i normativima za odgoj i obrazovanje u osnovnoj i srednjoj školi („Službene novine Kantona Sarajevo“ br 3/25 i 29/25) i Pravilnikom o radu. Nadalje, napominjemo da je Ministarstvo u skladu sa propisanom procedurom Vladi Kantona Sarajevo dostavilo informaciju o stanju u JU Sedma osnovna škola“, Vlada Kantona Sarajevo je usvojila informaciju Ministarstva i donijela Zaključak kojim se Školskom odboru JU „Sedma osnovna škola“ dostavlja na razmatranje inicijativa za prijevremeno razrješenje direktorice škole.

Shodno naprijed navedenom, informišemo Vas da Ministarstvo kao organ uprave, postupa isključivo u okviru zakonom utvrđenih nadležnosti, koje podrazumijevaju donošenje propisa, standarda i pedagoških smjernica na općem nivou, a ne pojedinačno operativno postupanje u konkretnim slučajevima u školama, čime se osigurava primjena principa zakonitosti i funkcionisanja pravne države. Zakonski i profesionalni okvir djelovanja je već uspostavljen kroz važeće propise i stručne standarde, te ne postoji pravni osnov da



Adresa: Reisa Džemaludina Čauševića 1, 71 000 Sarajevo

Tel: + 387 (0) 33 562-128

Web: <http://mo.ks.gov.ba>, E-mail: mo@mo.ks.gov.ba

Ministarstvo preuzima ulogu stručnih timova na nivou škole. Rad sa učenicima u riziku je kompleksan stručni proces koji zahtijeva individualiziran pristup, kontinuiranu procjenu i neposredan rad sa djetetom, što je u isključivoj nadležnosti školskih stručnih službi i, po potrebi, policije, centara za socijalni rad i zdravstvenih institucija. Upravo zbog toga zakon i jeste delegirao ovu odgovornost na nivo ustanove i struke, a ne na centralni organ uprave. Član 25. Pravilnika o provođenju odgojno-obrazovne podrške i stručnog tretmana učenika propisuje, citiramo:

Član 25. (Obaveze radnika škole za provedbu ovog pravilnika)

- (1) Direktor škole je dužan pratiti i učestvovati u provođenju ovog pravilnika tokom nastavne godine.
- (2) Stručna služba škole je dužna pratiti i učestvovati u provođenju ovog pravilnika tokom nastavne godine.
- (3) Nastavnici su dužni učestvovati u provođenju ovog pravilnika tokom nastavne godine.
- (4) Direktor škole je dužan razmotriti svaku pismenu žalbu roditelja i drugih zainteresiranih strana koja se odnosi na djelimično ili potpuno neprovođenje ovog pravilnika i odgovoriti najkasnije u roku od deset dana.
- (5) Ukoliko radnik škole ne provodi obaveze propisane ovim pravilnikom, podliježe disciplinskoj odgovornosti propisanoj aktima škole i drugim relevantnim zakonskim aktima koji reguliraju odgoj i obrazovanje u Kantonu Sarajevo.

Iniciranje, da Ministarstvo daje operativne upute za svaki pojedinačni slučaj predstavlja pogrešno razumijevanje uloge Ministarstva i dovodi do narušavanja profesionalne autonomije stručnjaka u školi i narušava primjenu zakonitosti. Ministarstvo obezbjeđuje normativni okvir i sistemske uslove (stručni kadar, materijalno-tehnička sredstva, plaće radnika i sl), dok je za njegovu pravilnu primjenu odgovorna škola. Također, želimo Vas informisati da su učenici redovno na nastavi i da je roditeljima učenika objašnjena obaveza pohađanja nastave. Nadalje, u rješavanje navedene problematike uključeni su i referalni mehanizmi u zajednici, koji imaju obavezu osiguranju podrške i rada sa porodicom učenika u riziku.

U vezi izvještavanja o navedenom događaju od strane Ministarstva, informišemo Vas da je obaveza Ministarstva da u javnom prostoru iznosi isključivo provjerene, istinite i objektivne informacije o svim događajima koji su u interesu javnosti, naravno uvažavajući zaštitu ličnih podataka malodobnih učenika, te nije jasno zašto se istinita informacija ne bi dostavila javnosti i na taj način spriječilo pogrešno zaključivanje ili donošenje zaključaka na osnovu neprovjerenih informacija, a što nije u interesu svih učenika i školske zajednice.

Ministarstvo ostaje opredijeljeno za saradnju sa svim relevantnim institucijama u cilju zaštite zdravlja, sigurnosti i cjelokupnog razvoja učenika, a posebno ističemo značaj multisektorskog pristupa svih nadležnih resora u osiguravanju adekvatne i pravovremene podrške svim učenicima, osiguranja optimalnih uvjeta za rast i razvoj, kao i osiguranja podrške učenicima u riziku i njihovim porodicama.

S poštovanjem,



Dostaviti:

1. Naslovu
2. a/a.



Adresa: Reisa Džemaludina Čauševića 1, 71 000 Sarajevo

Tel: + 387 (0) 33 562-128

Web: <http://mo.ks.gov.ba>, E-mail: mo@mo.ks.gov.ba

